

26. januar 2015

UPA2015/51

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Pisortat inissiattaannik aqutsinermi akissaajaatit ikililernerqarsinnaanerannik periarfissat pillugit misissuisoqarnissaanik apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen, Partii Naleraq)

Tungavilersuut:

Pisortanik ingerlanneqartut aamma suliffeqarfiit assersuutigalugu A/S INI allallu selskabit ilanngullugit ingerlatsinermi ukiuni kingullerni akilersinnaasagut sinnerlugit ilaatigut akiligassanik akilersuisarnerput qulaajarneqassasoq matumuuna oqallisissiatut saqqummiuppara.

Innuttaasut nunatsinni atugaat ukiuni kingullerni ilungersunarsiartuinnarput, ilaatigut suliffissatigut, inuussutissarsiornikkut, sanaartornikkullu ineriartornerit, nunatta ilaannaani annerusumik ingerlanneqarmata, soorunami tamanna nunarput tamaat ataatsimut isigalugu ilungersunartorujussuuvoq, ulluinnarnimi inuuniarnikkut atukkagut ilungersunarsiartuinnartut akitigut qaffakkiartuinnavimmata, allaallu taamaattussaannartut isigilersimallutigit.

Tassami ilumoorsinnanngilaq pingaartumik sulisartut allallu aningaasarsiakitsut eqqarsaatigissagaanni akilersinnaajunnariartugaanik illumi najugaqarnermut akiligassat qaffakkiartuinnarmata, tamannalu sumik pissuteqarpa? Ingerlatsinerput akisuallaarpa? imaluunniit sippulimmik ingerlatsinermi akisuumik ingerlatsivugut.

Tupinnarluinnarpormi sulisartut, allallu akissarsiakitsut, suligunik suligunik ilaatigut aningaasarsiatik tamarluinnangajaasa illumut ineqarnerminnut akiliutigisarmatigik, allallumi ilaat akilersuigaluarlutik angummassinnaasaratilluunnit. tamatumalu kingunerisarlugu ilaatigut ilaqutariit meerartallit illuminnik anisitaasariaqartarlutik soorunami tamanna akuerineqarsinnaanngilaq, akiligassallu taamak qaffassimatigippata taava sukumiisumik misissuisoqartariaqalerpoq, akilersinnaasagummi sipporlugit akilersuinnissarput akilersuinerpullu akuerineqarsinnaanngilaq!

Ilaqutariit aningaasarsiakitsut allaat meeqqaminnut pilersuisinnaanerit inuussutissanik atisassanik angummanniarnerat amigarluinnalersimavoq, tassami tullianut aningaasarsinissaminnut allaat ilaat inuussutissaarutput meerartalinut ilungersunartorujussuarmik.

Aammalu ilanngullugu nalilersortariaqarparput ineqarnermut tapiissutaasartuq ilumut inuit aningaasarsiamikkut isertitakitsut allallu pissakinnerusut eqqarsaatigalugit illumut akiliinissamut tapiissutaasartuq annertussusia naammannersoq?

Tassami sulisartukkormiut, anaanat, ataatalu kisimiittut, aammalu sulisinnaajunnarnersiutillit, utoqqaallu, kiisalu ilinniartut meerallit assut atugaat ilungersunartorujussuarmik inissikkiartuinnarput ilaatigut ineqarnermut akiliutaasartut qaffakkiartuinnarnerat allallu akit qaffakkiartuinnartut pissutigalugit.

Pisortani ingerlatsineq ilumut ineqarnermut akit qaffakkiartuinnarneranik kingunilik akuersaaginnarsinnaajunnaarparput, akilersinnaasagut sipporlugit akilersuinerit allanngortitariaqalerput, tassami ilaatigut nunatsinni nunaqarfinni illoqarfinnilu illut inoqanngitsorpassuit kiassarnerat aammalu atorneqaratik nakkutigineqaannarnerat ineqartunut akilersortiinnarsinnaajunnaarparput.

Tamattami ilisimalluarparput nunatsinni inissaaleqisorpassuaqartoq, taamaakkaluartoq illorpassuit inoqanngitsut kiassarneri attartortunut allanut akilersortillugit ingerlavugut, taavami sooq illut inoqanngitsut attartortunik inuttalerniangilagut?

Tassami taamaaliornikkut aamma nakkutigineqarnerat kiassarnerallu pisortat akiligaannik unitsinneqassaaq aningaasallu sipaarneqarlutik, tassami inoqalerpata namminneq isumagilissavaat allanullu ineqartunut artuukinnerat minnerulissagaluqaqaluni.

Ilumut aamma pissusissamisoorpaa pisortani ingerlatsissagaanni aatsaat Qitiusumik allaffissuaqarluni akisoqisumillu akilersuilluni ingerlatsisoqarsinnaasoq? Kommuunit kattussuunnerat aamma isumaqarpoq suliassat namminneq kivissinnaasaat tunniussuunneqassasut, taava sooq kommuunit nammineersinnaanerit atunngilarput?

Qangatut eqqarsartaaseqarnerput qimanniartigu! Marloqiusamik allaffissornikkut ingerlatsiuarneq qimattariaqalerparput, kommuunit atorluarniartigut pisinnaasamikkut assigiinngitsorpassuarnik misilittagaqarput, aammalu sukkanerusumik akikinnerusumillu inuiaqatigiinnut kiffartuussisinnaallutik, tassami akissaqanngilagut tamatta immikkut allaffissornikkut akisoqisumik sulisorpassualinnillu ingerlatsissalluta.

Inuit pissakinnerusut pilliutigineqartuannarsinnaangillat akilersinnaasaat sipporlugit akilersuisillugit.

Pisortat ingerlatsinerat akisoqisoq annikillisartariaqarpoq, akilersinnaasagut sipporlugit inuiannut amerlasuunut naapertuuttumik aaqqissuunneqarnerput nalilertariaqalerparput, akissaqanngilagummi, pissakinnerusummi inuit pilliutigiuannarsinnaangilagut.

Aningaasanimmi amigaateqarpugunngooq, ila ingerlatsinerpununa aamma akisuallaarujussuartoq.

Oqallilluarisi.